

Би бичкн күүкдт дуртав

Би Төрскнэ дээнд салдс йовсндан,
Бахлурцаһан түрү, зовлң болмар эдлсндэн,
Бичкүдин шуугата-дөгөтө нааднд жилвтөв,
Байр, жирһл өгдгтнь эднд дуртав.

Би Төрскнэ дээнд салдс йовсндан,
Бичкүдин инэд тиигхд эс үзсндэн,

Альмншң әдл әмтәхн инәдәрн
Амрч-амрчаһад инәдгтнь эднд дуртав.

Би Төрскнә дәәнд салдс йовсндан,
Бичкдүдин хорлһ нүдәрн үзж хальшрсндан,
Гер болһнд эдниг үзхләрн, байрлнав,
Герл һардг көркхн чирәстнь дурлнав.

Би Төрскнә дәәнд салдс йовсндан,
Бичкдүдин өлн нульмснд зүркм шарклсндан,
Эдниг көөмгү һарарн көөлдж шүүрәд,
Эцкнриннь зөөсн өдмг иддгтнь дуртав.

Би Төрскнә дәәнд салдс йовсндан,
Бичкдүд һалд шатж үксинь үзсндән,
Эдниг шовуншң жиргәд бәәдгтнь дуртав,
Эк-эцкнрән теврәд үмсдгтнь дуртав.

Би Төрскнә дәәнд салдс йовсндан,
Бичкдүдин орчд сумта автомат үүрсндән
Муурлав. Ода эдниг үүрхдән дуртав,
Мөрн деер довтлхлань, бас дуртав.

Би Төрскнә дәәнд салдс йовсндан,
Бичкдүд тиигхд дегтрәсн һаһцсинь үзсндән,
Эднәр школын класс дүүрдгтнь дуртав,
Эн нарн кевтә герлтдгтнь дуртав.

Би Төрскнә дәәнд салдс йовсндан,
Бичкдүдин билг-эрдминь эс үзсндән,
Эдниг хоңх мет жиңндгтнь дуртав,
Эргж дуһрад, өсрәд биилдгтнь дуртав.

Би Төрскнә дәәнд салдс йовсндан,
Бүшкүр, кеңкргин дууһинь эс соңссндан,
Эднә отрядын дуңһрад ирж зогсдув,
Эднтә хамдан шинәс «Орленок» дуулдув.

Би Төрскнә дәәнд салдс йовсндан,
Бичкдүдин төлә ааһар цусан асхсндан,
Орчлң дән угаһар бәәтхә гидүв,
Оньдин бичкдүд байрар бәәтхә гидүв.